

慎宜軒筆記十卷

丁丑

慎宜軒筆記

十卷

方守穀題

教授京師累年會清史館開復同膺編纂之聘予短視步恆趨
起每適館第必肩隨予館長趙次珊先生見之迎笑曰吾年八
十矣儻與君競行未知孰爲先後他日君逮吾年欲無顛蹶其
將若弟是賴乎眾爲粲然予亦自念疲蹇固當先弟終平生所
著或未編次且託之弟豈知今者乃於荒江窮谷間爲弟寫定
茲稿嗚呼悽矣弟四十後嘗撰孟子講義左傳選讀二書於義
理文法論之綦詳正志學校已印行世多有之故是編不更採
入云乙丑夏四月朔仲兄永樸記

吾師慎宜先生既歿三年其孤安國泣告養性曰先君筆記手
寫未就吾母亟圖付印以成遺志旣請仲父編次之矣欲浼先

生爲敘其端可乎養性曰先生之學非其人不能傳是豈庸陋
所敢任顧夙荷愛重情最深渥又安能已於言也始養性入小
學時已聞先生與兄蛻私先生並爲海內大師歲壬戌應先生
召課其二子乃得昕夕侍教兩先生皆蓄德能文其誨後進披
瀝肝膽聞者往往昭然若發矇先生尋病輔頰艱於言猶講說
經史古文曲極神趣響若洪鐘時或掀髯大笑足蹈手舞夜分
不勞忘其身之疾也一日出示筆記多讀書心得足以裨益學
者於時安國兄弟方依依案旁先生因曰是編之印尙未有期
此子儻能述吾事繼吾志邪遂以其讀書事拳拳見託養性固
謝不敏先生淚涔涔下久乃仰而噓曰言之工拙視氣之盛衰

氣之盛衰視養之善否韓文杜詩垂老而氣猶盛蓋善其養也
蘇氏且未能矣余頃作阮將軍神道碑子觀之氣得無衰乎養
性朗誦數過但覺雄奇恣肆如蛟龍不可控搏豈意其竟爲先
生絕筆也哉嗚呼養性館此五年矣眷懷知遇慚負實多風雨
雞鳴未嘗不對遺文而竇涕嘆疇昔侍教之樂邈難追也今幸
蛻私先生券遊歸里杖履猶健復得有所承教而是編經其寫
定及早流傳尤足慰先生之志也夫丙寅夏五月門人何養性
謹識

慎宜軒筆記目次

卷一 易

卷二 詩

卷三 大學 論語 大戴禮

卷四 史記 前漢書

卷五 後漢書 南史

卷六 管子

卷七 老子 莊子 墨子

卷八 呂氏春秋 韓非子 法言

卷九 韓昌黎集 朱子集

卷十 雜

予弟叔節詩古文辭夙爲海內賢士大夫所稱許嘉興沈乙庵方伯嘗取其詩與馬通伯文並印行謂皖之二妙惜晚年諸篇未及載古文弟手定卒前一歲刊成其讀書所記多有裨世道且詳考古人文勢語脈更證之他書故解說往往得微旨以逐時塗改朱墨狼藉行間病中屬諸篋旣逝予不忍啟視逾年乃攜至建德分四類鈔之而附所聞於父兄師友者名曰慎宜軒筆記凡十卷初先妣生永樸兄弟三人其後庶母又得兩弟伯兄績學早逝弟才氣英邁體亦視予爲健自登賢書數試禮部不第疆吏欲薦而官之輒固辭鼎革後益浩然無用世意偕予

慎宜軒筆記卷一

桐城姚永概叔節

易

乾九二見龍在田文言以龍德正中釋之而不及位蓋二本陰位不及九五之以陽居陽然位由乎時命德則備於己身雖不當位仍不失爲龍

文言庸言之信庸行之謹與中庸君子之道四丘未能一節詞同然則乾之九二殆夫子自道與遯世无悶二句卽論語人不知而不愠也遯世无悶人不我知而无悶也從我言之不見是而无悶人不知我之道而无悶也從道

性理轉筆言 卷一
言之卽佛所去之我執法執
乾上九亢龍有悔陽之極也坤上六龍戰于野陰之極也陽極而
亢君子於是審其幾焉陰極而戰君子於是乘其時焉紂之惡不
稔武王不敢有牧野之師新莽之亂不甚光武不得有昆陽之勝
胥是道也

陽大陰小故曰大哉乾元陽虛陰實故曰至哉坤元馬通伯引漢
書集注訓至爲實是也九家云乾氣之坤萬物資受以生然則坤
元從乾元來也六二之大六五之元皆乾也

屯六三君子幾不如舍王注幾辭也傳義皆訓幾微案漢書幾字
多作冀讀此亦當同之言冀其得禽不如舍之而去象曰以從禽

也正釋幾字

需與訟皆乾坎相連之卦坎上乾下爲剛健而不陷故曰利涉大川乾上坎下爲入於淵故曰不利涉大川蓋坎險忌陷入在上爲旣往有出坎之象在下爲方來無出坎之象

小畜文王所以自處明夷文王所以戒紂

小畜以六四一陰得位畜止下三陽上承九五故初九九二皆以能復爲吉九三以健極欲往爲脫輾反目然四雖承五非用意長逢也亦有畜止其惡之義而必貴於孚至於有孚則不獨四能孚五五亦能孚四而畜道成矣富以其鄰傳曰不獨富也九五之富由鄰四而來四能富五德至矣弗可加矣故上九旣雨旣處之下

又多戒辭

履六三不中不正眇且跛者也而得上九之應欲變爲乾竊大君之位而代之不知其凶故孔子深戒之然文王爻辭則有戒於人君之意若曰不可以其眇且跛而忽之也彼方能視能履後雖不終有凶當時固可畏矣更申之武人爲于大君詞意尤明切明皇之於祿山蓋此爻矣

泰九二包荒用馮河不遐遺朋亡得尙于中行案三陽爲朋喜同惡異君子不免朋亡則無此病所以能不遐遺也二上下皆陽外卦皆陰二居中朋苟不亡斯陰陽不交無以包荒矣
九三居天地之交乃曰无平不陂无往不復上六居泰卦之終乃

曰城復于隍泰吉卦也其取象如此意微矣

小人不利君子貞止及榮祿而已非能損其貞也孔子恐人誤會以爲當否之時君子行貞有所不利故大象特加不可榮以祿句明之

以卦觀之否之三陽爲大往應無吉辭然九四曰有命无咎九五曰休否大人吉上九曰傾否先否後喜雖時事至不可爲君子未始無救之之道况四爲近臣五爲大君尤任尊責重果能使疇有離祉之益亡得苞桑之繫否豈不可泰乎至上九則否道已極故獨得後喜之象

上九傾否先否後喜侯果注傾覆也案覆如左傳沐則心覆之覆

傾否者倒轉之也否傾則泰故先否後喜世之治亂心之明暗止在一反覆之而已剝之一陽覆之則爲復否之天地不交覆之則爲泰一也

同人之初懼其不能遠也故勉以出門同人上居卦終已不任事雖同人于郊未必能澤被天下故曰志未得必也以九五之尊同乎六二乃盡同人于野之義乎

九五外卦本乾互又得乾既中且正故大師克相遇

子路問政子曰先之勞之請益曰無倦勞謙卽先勞之義君子有終卽無倦之義

小畜九五富以其鄰九家云鄰爲四以九五鄰六四陰陽相得曰

富謙六五不富以其鄰以六四鄰六五陰陽不相得曰不富

豫之卦辭爲建侯行師傳曰聖人以順動則刑罰清而民服古者兵統於刑故彖言行師而傳言刑罰

隨大亨貞无咎而天下隨時校勘記引釋文亨下有利字案王注相隨而不爲利正災之道也故大通利貞乃得无咎也爲隨而令大通利貞得於時也是王弼本有利字疏云大亨貞正无有咎害而天下隨之以正道相隨故隨之者廣若不以大亨貞无咎而以邪僻相隨則天下不從也是正義本無利字馬通伯云乾始能以美利利天下不言所利大矣哉凡彖傳之釋元亨利貞者不言利亦不言元皆於此發例案全備乾四德之卦五爲屯隨臨无妄革

彼四卦家傳皆不及利則此亦應無利字

剝之上九不言吉凶蓋碩果僅存視所處何如耳如君子耶則不食以待七日來復而利有攸往如小人耶則並此碩果而剝之是爲自剝其廬凶何待言

剝復之間有坤存焉小人剝廬剝盡則爲坤然陽不終無剝之一陽在剝爲碩果在坤爲上六之龍

出入无疾蓋謂出剝而入復一陽從上九而反於初九也故傳曰復亨剛反剝復互皆重坤二卦中有坤存然則七日來復李鼎祚謂剝卦陽氣盡於九月之終至十月末坤卦將盡則復陽來隔坤之一卦六爻爲六日復來成震一陽生爲七日其說可信而王弼

曰大則爲反出則剛長與經文先言出而後言入次第不合剛長自是陽出以後事復亨爲句剛反爲句

无妄彖云剛自外來而爲主於內則乾元之寄應在初九乾元者始而亨者也初之爲元尤合始義

雖處无妄之世而元亨利貞之理未嘗一日或息亦不可一息或背匪正有眚乃不利有攸往故初九六二得位一日往吉一日則利有攸往九四雖失位尙曰可貞无咎惟九五一爻所謂剛中而應以處无妄而有疾斯真无妄矣故勿藥有喜苟非正而得災眚不可謂之无妄也

有无望之福又有无望之禍史記朱英語也蓋无望本兼禍福而

卦辭多言疾眚窮災者无望之福往往致禍非真福也惟无望之禍君子慎所以處之而已

天下雷行物與无妄雷能開通萬物以之發生是爲无妄之福電先雷至觸人立死是爲无妄之禍

一陰在四但曰柔得位而上下應之曰小畜一陰在五乃曰柔得尊位大中而上下應之曰大有在四臣也在五君也故四五二陰同志畜健而尙賢曰大畜畜之分大小明明在四五兩爻沈起元乃謂不在此殊不然也艮陽巽陰別是一義

剛健謂乾篤實謂艮竊疑輝光日新其德謂三至上象離之光明大畜畜賢在四五二陰其四陽皆賢者也初爲未成之賢正宜自